

Evening Dogri (NSD) Bulletin 31-08-2024

आकाशवाणी

खास खास खबरां

1 प्रधानमंत्री नरेन्द्र मोदी होरें जिला न्यायपालिका दे राष्ट्रीय सम्मेलन दा उद्घाटन कीता। उनें महिलाएं खलाफ अत्याचारें दे मामलें च सख्त कनून ते तौले फैसले लैने लेई आखेआ।

2 प्रधानमंत्री नरेन्द्र मोदी होरें त्रै वंदे भारत एक्सप्रसे ट्रेनें गी वीडियो कांफ्रेंसिंग राएं झंडी दस्सी।

3 केन्द्री मंत्री डॉ. जितेन्द्र सिंह होरें नमीं दिल्ली च BIOE 3 नीति गी जारी कीता।

4 भारत दे यूपीआई नै अप्रैल-जुलाई च तकरीबन 81 लक्ख करोड़ रपे दे लैन-देन दा कम्म कीता ते दुनिया दे प्रमुख डिजीटल लैने-देन भुगतान प्लेटफार्म गी पिच्छे छोड़ी दित्ता।

5 भारतीय दूतावास नै लोस च साइबर घोटाला केन्द्रें च फसे दे 47 भारतीयें गी बचाया।

6 पैरालंपिक खेड्डें च भारती पैरा शूटर रुबिना फ्रांसिस नै महिलाएं दे 10 मीटर एयर पिस्टल एसएच-1 फाइनल लेई थाहर पक्की कीती।

<><><><><><>

PM Judiciary

प्रधानमंत्री नरेन्द्र मोदी होरें गलाया ऐ जे महिलाएं दे खलाफ होने आले अत्याचार ते बाल-बच्चें दी सुरक्षा समाज लेई बड़े गै चिंता दे विषय न। उलें गलाया जे

महिलाएं दी सुरक्षा लेईं मुल्खै च केईं कनून बनाए गे न पर इनें गी जहोर मता सख्त करना लोडचदा ऐ। उनें आखेआ जे जिन्नी तौले महिला प्रतिष्ठाएं कन्नै होने आले अत्याचारें उप्पर फैसले कीते जांगन, उन्नी गै तौले सुरक्षा दा आश्वासन थ्होग। प्रधानमंत्री होरें अज्ज नमीं दिल्ली दे भारत मंडपम च दऊं दिनें गतर चलने आले राष्ट्र जिला न्यायपालिका दे सम्मेलन दा उद्घाटन करदे होई एह गल्ल आक्खी। उनें गलाया जे सुप्रीम कोर्ट दी स्थापना दे 75 ब'रे पूरे होई गे न, जेहदे कन्नै लोकतंत्र दी जननी रूप च भारत दा मान ते संवैधानिक मूल बधेआ। उनें सत्यमेव जयंते दे सांस्कृतिक उद्घोषणा उप्पर बी लोह पाई ते आखेआ जे न्यायपालिका गी संविधान दा रक्षक मन्नेआ जंदा ऐ। उनें आखेआ जे अमरजेंसी दे कोलकाल च बी सुप्रीम कोर्ट नै देशवासिएं गी मौलिक हक-हकूक दी गारंटी दित्ती ते राष्ट्रहित दे कुसै बी सुआल पर सुप्रीम कोर्ट नै राष्ट्री एकता दी सदा हिफाजत कीती ऐ। भारतीय न्यांह संहिता पर बोलदे होई प्रधानमंत्री होरें आखेआ जे उनें कनूनें दी भावना ऐ नागरिक पैहले,। अपने संबोधन च भारत दे मुख न्यायधीश डी.वाई.चन्द्रचूड नै आखेआ जे एह सम्मेलन अखिल भारतीय जिला न्यायधीश सम्मेलन दी अगली कड़ी ऐ। पैहले एह सम्मेलन इस ब'रे मार्च च कच्छ च होआ हा, जित्थें भारतीय न्यांह ते कनून बवस्था कन्ने सरबंधत महतवै आले मुद्दे ते कनून बवस्था ते समाज दे ढांचे च न्यायपालिका दी भूमका पर सोव बचार होआ हा।



PM-Vande Bharat

प्रधानमंत्री नरेन्द्र मोदी होरें अज्ज वीडियो कांफ्रेंसिंग राएं वंदे भारत रेलगड्डिएं गी झंडी दस्सियै रवाना कीता। एह त्रै रेलगड्डियां मेरठ थमां लेइयै लखनऊ, मधुराई थमां बैंगलुरु ते चिन्नेई थमां नगरकोइल लेईं चलंगन। इस मौके बोलदे होई मोदी होरें आखेआ जे अज्ज उत्तर थमां दक्खन तोड़ी भारत दी विकसित बनाने दी यात्रा च इक नमां पन्ना जोड़ेआ ऐ। उनें गलाया जे हुन पूरे मुल्खै च कुल 102 वंदे भारत रेलगड्डियां चला'रदियां न। भारत च हुन रेलवे स्टेशनें च

बी बदलाव होंदे जा'रदे न। लौहके रेलवे स्टेशनें गी उप्पर बी हुन एयरपोर्ट जनेइयां नमियां सुविधां आंदियां जा'रदियां न। मेक इन इंडिया ते आत्म निर्भर भारत दे नजरियै गी पूरा करदे होई हुन वंदे भारत एक्सप्रेस इनें त्रैनें रस्तें दी संपर्क सरिस्ते च सुधार आन्नग।

<><><><><><>

Special Train

सोमवारी अमावस दे मौके उप्पर रेलवेज नै हरिद्वार जाने लेई चेची रेलगड्डी जारी कीती ऐ तां जे जम्मू, उधमपुर ते कठुआ जिले दे लोक उत्थें अरामे कन्नै जाई कसन। एह रेलगड्डी कटरा थमां पैहली सितम्बर गी चलोग ते अगले दिन उत्थुं वापस औग। केन्द्री मंत्री डॉ. जितेन्द्र सिंह होरें रेलवेज दे इस फैसले गी सोशल मीडिया उप्पर शेर कीता ते गलाया जे एहदे कन्नै श्रद्धालुएं दा सफर आसान होई जाग।

<><><><><><>

BIOE 3 Launch

साईंस एंड टैक्नालोजी दे केन्द्री मंत्री डॉ. जितेन्द्र सिंह होरें अज्ज नमीं दिल्ली च बायोटेक्नालोजी फॉर इकॉनमी, इनवायरनमेंट ते इम्प्लॉयमेंट यानि BIOE 3 पॉलसी गी जारी कीता। मीडिया गी संबोधत करदे होई डॉ. सिंह होरें गलाया जे इस पॉलसी कन्नै मुखै च बायो मैनुफेचटिंग गी बढ़ावा थहोग। उनें इब्बी गलाया जे भविक्ख च दुनिया दी अर्थबवस्था बी बायोइकॉनमी कन्नै बधोग।

<><><><><><>

Rahul Gandhi

लोकसभा च बरोधी धड़े दे नेता राहुल गांधी होर नेशनल कांफ्रेंस ते कांग्रेस गठबंधन दे मेदवार दे हक्कै च प्रचार करने लेई औंदी 4 सितम्बर गी जम्मू

कश्मीर च दऊं चुनावी रैलिएं दरान भाषण देंगन। कांग्रेस पार्टी दे महासचिव गुलाम अहमद मीर, जेहड़े दक्खनी कश्मीर च डुरू थमां असेंबली दा चुनां लड़े करदे न, होरें दस्सेआ जे राहुल गांधी होर डुरू च ते कन्नै जम्मू संभाग दे संगलदान च बी चुनावी रैली गी संबोधत करगंन। इनें दौनें गै हल्के च पैहले गेड़ दे चुनां तैहत ओंदी 18 सितम्बर गी वोट पोआए जाने न।

<><><><><><>

Political Activities

जम्मू कश्मीर च पैहले गेड़ दे असेंबली चुनाएं लेई चुनावी मैदान सज्जने दे कन्नै गै प्रदेश च सियासी गतिविधियां बी जोर फगड़दियां जा करदियां न। 18 सितम्बर गी होने आले पैहले गेड़ दे चुनां लेई मैदान च उत्तरे दे 219 मेदवारें दे सियासी भविक्ख दा फैसला 23 लक्ख 27 ज्हार मतदाता करगंन जिंदे च 5 लक्ख 66 ज्हार युवा मतदाता बी शामिल न। पैहले गेड़ तैहत जम्मू संभाग दिएं 8 ते कश्मीर घाटी दिएं 16 असेंबली सीटें लेई वोट पाए जाने न। इक बक्खी जित्थें सियासी पार्टियां मतदाताएं गी अपने पक्ख च करने लेई अपने चुनावी घोशणापत्र जारी करै करदियां न उत्थें गै टिकटां नेई थहोने करी नराज होए दे केई नेताएं पार्टियां छोड़ी दित्तियां न। जम्मू खित्ते च बीजेपी थमां नेताएं दे बाहर जाने दा सिलसिला जारी ऐ। पार्टी दे सांबा जिला प्रधान कश्मीर सिंह होरें सांबा थमां टिकट नेई दित्ते जाने दे बरोध च पार्टी छोड़ी दित्ती ऐ। बीजेपी नै सांबा थमां सुरजीत सिंह सलाथिया होरें गी टिकट दित्ता ऐ जेहड़े 2021 च नैशनल कांफ्रेंस दा साथ छोड़ियै बीजेपी च शामिल होए हे। केन्द्री मंत्री ते केई वरिष्ठ नेता जम्मू च बीजेपी लेई चुनां प्रचार करै करदे न।

<><><><><><>

Ayush

भारत दे मंत्री प्रतापराव जाधव होरें आखेआ ऐ जे अगले 5एं ब'रें च 10 नमें आयूष संस्थान खोले जांगन। उनें इस गल्लै पर बी जोर दित्ता जे मंत्रालय हर धरै च आर्युवेदे गी पजाने लेई प्रधानमंत्री हुंदे जतनें गी पूरा करने लेई वचने बज्जे दा ऐ। कल नमीं दिल्ली च ऑल इंडिया इंस्टीच्यूट ऑफ आर्युवेद च इक कार्यक्रम गी संबोधत करदे होई आखेआ जे योग ते आयुवेद गी लेइयै बनी दी धारणा च वैश्विक बदलाव आया ते उंदी दिलचस्पी हुन तेजी कन्नै इस गी लेइयै बधा'रदी ऐ। उनें आखेआ जे देस च आयूष संस्थानें दे विस्तार कन्नै परम्परागत चिकित्सा प्रणाली च बाद्धा होग ते हर भारतीय नागरिक गी फायदा होग।

<><><><><><>

Russia Helicopter

रूस दे काम-चटका इलाके च वाचका झेटस ज्वालामुखी दे कोल 22 लोकें गी लेइयै जा'रदा इक रूसी हैलीकाप्टर जापता होई गेआ। एमआई8टी हैलीकाप्टर वितेयाज एरो एसयरलाइन आस्सेआ चलाए जा'रदा हा जेहड़ा बडलै डोआरी भरने दे थ्होड़े गै समें बाद संपर्क च नेई रेआ। संघीय हवाई परिवहन अजेंसी नै दस्सेआ जे हैलीकाप्टर डोआरी भरने दे फोरन बाद इक निर्धारित समें च संपर्क थमां बाहर होई गेआ ते ओहदे कन्नै राबता त्रुट्टी गेआ। उआं लापता हैलीकाप्टर दी तलाश शुरू करी दित्ती गई ऐ ते जमीनी बचाह टीम बी तैनात कीती गई ऐ।

<><><><><><>

Kolkata R.G.Kar

कोलकाता दे आर.जी.कर मैडिकल कालेज ते अस्पताल दे जूनियर डाक्टरें अज्जै थमां टेली-मेडिसिन सेवा शुरू करी दित्ती ऐ। एह सेवा हर रोज बडलै 10 बजे थमां दपैहरी 2 बजे तगर खुल्ली रौहग। पिछले म्हीने दी 9 तरीक गी आरण्जी.कर मैडिकल कालेज च पीजीआई दे डाक्टर कन्नै दुष्कर्म ते हत्या दे विरोध च

जूनियर डाक्टरें अजें बीह ड़ताल पर न। ओहू उनें सारे लोकें गी गिरफ्तार करने दी मंग करा'रदे न। सीबीआई इस मामले दी पड़ताल करा'रदी ऐ।

<><><><><><>

UPI

दुनिया दे अगुआ डिजीटल भुगतान मंचें गी पिच्छे छोड़दे होई यूपीआई नै इस ब'रे अप्रैल थमां जुलाई तोड़ी 81 लख करोड़ रपे दी लैन देन कीती ऐ, जेहदे कन्नै एह इस ब'रे 37 फीसद बधी ऐ। ग्लोबल पेमेंट्स मंच पेसिक्योर थमां दित्ते गेदे आंकड़ें दे मताबक लेन देन हुंदे न। एह आंकड़ा 2022 थमां 58 फीसदी बधेआ ऐ। यूपीआई दा एह आंकड़ा चीन दे अलीपे, पेपल ते ब्राजील दे पिक्स गी लैन देन च पार करी चुके दा ऐ।

<><><><><><>

Rashtriya Poshan Mah

महिलाएं ते बच्चें दे विकास सरबंधी केन्द्री मंत्री अन्नपूर्णा देवी होरें गांधीनगर गुजरात दे महात्मा मंदरै च राष्ट्रव्यापी अणियान राष्ट्री पोषण माह दे 7में संस्करण गी शुरू करोआया। पोषण माह दा एह संस्करण खून दी कमी बारे जागरूकता पैदा करने, पोषण बी-पढ़ाई बी, टैकनालोजी आधारित पैहलकदमिं ते कुपोषण दे खात्मे लेई इक बा00 खुराक बारे जागरूकता पैदा करने पर केन्द्रित होग। इस मौके बोलदे होई केन्द्री मंत्री होरें आखेआ जे मुख्य च सेहतमंद ते सशक्त महिलाएं ते कुड़ियां गै विकसित भारत दा लक्ष्य हासल करने च मददगार साबत होइ सकदियां न। उनें आखेआ जे प्रधानमंत्री नरेन्द्र मोदी होरें महिलाएं दी अगुवाई च विकास दा नजरिया रखे दा ऐ ते इसी सच करने लेई उंदे मंत्रालय नै बक्ख-बक्ख योजनाएं आस्तै 3 लख करोड़ रपे दित्ते न। मंत्री होरें आंगनवाड़िं दा दर्जा बधाने दे गुजरात दे मॉडल ते शासन दे कम्में च तकनीकें दे इस्तेमाल दी सराहना कीती। मंत्री होरें मुख्य दिं सव्वने आंगनवाड़िं च "एक पेड़ मां के

नाम" अभियान गी शुरू करोआया। गुजरात दे मुख्मन्त्री भूपेन्द्र पटेल ते महिला ते बाल विकास राज्सय मन्त्री भानू बेन बबारिया होर बी इस मौके पर मजूद हे। पोषण माह दे दरान मुख्म भरै च केई कार्यक्रमें दा सरिस्ता कीता जाग जिंदे राएं समाज च सत्तदार खुराक दे महत्व बारे जागरूकता पेदा कीती जाग।

<><><><><><>

Paralmpics

पैरालंपिक खेड्डें च भारतीय पैराशूटर रूबिना फ्रांसिस नै क्वालीफाइंग दौर च 7में नंबर पर रौहने मगरा जारी पैरिस पैरालंपिक च महिलाएं दे 10 मीटर एयर पिस्टल एसएच-1 फाइनल लेई थाहर पक्की करी लैती ऐ। यबिना नै त्रिए सीरीज च सुधार करियै 95 जिस दे मगरा क्रमशः 92/95 ते 94 अंक गी कठेरदे होई अपना कुल स्कोर 556-बीएक्स बनाया ते फाइनल च थाहर पक्की करी लैती। स्वरूप उन्हलकर नै क्वालीफाइंग राउंड च 613.4 दे स्कोर कन्नै 14में नंबर पर रौहने मगरा मर्दे दी 10 मीटर एयर राईफलज खेडोने दे एसएच-1 च फाइनल च इक थाहर नेई थ्होई। अवनी लेखरा होरें महिलाएं दी 10 मीटर एयर रैफल एसएच-1 च सुन्ने दा मैडल ते मोना अग्रवाल नै कैह् दा तगमा हासल कीता।

<><><><><><>